




**Parugadu boe pagai,
ure boe ewadaru tabo,
barae ewadaru tabo**





AKAIWODO WOE

Parugadu boe pago baperare pagai , dukodire parugadu boere pagaiwo mode nuba paromode paeda pemegawo.
 Nowu inoduwo pagi, pemegawo pagai , pagodu waduwo, nowu inodu pemegawo pagai emagadure uwo pureore. Dukodire padu-
 wawo nuba ero mode parugadu boe pai: pawo vota iadukeje ewo
 vota pai jamedu, pago bapera pemegawo , pamara godu
 pemegawo, pago saúde pemegawo , iagere jamedu makare.
 Dujire egore exercer cidadania, jamedu eduwawo paro kurireu
 bogai, makaguragare ukare ji pureure, emetoruwo parugadu boe
 pai, pamagare pamedae boe tabo, pamago boe tabo, paduwawo
 nuba paromode, pagaiwo pemegawo
 Awu bapera towujedure, tuwo boe eduwado nuba boerowo nowu
 processo eleitoral keje, boe erugadu boe eduwawo, ewo towuje
 uwo pureore.
 Ćedaidure awu bapera uwo tagaidudo taduwo nowu eleições ka,
 tagaiwo pemegawo igiduba maragodo mode pagai.
 Awu bapera mugure jamedu toro nowu TRE o pagina keje, ainore
 ure TRE/MT, na internet: <https://www.tre.mt.jus.br/ure> barae
 ewadaru tabo, jamedu ure Boe ewadaru tabo.
 Ainore ure tarugadu boe tagaiwo pemegado ji!!

Desembargador CARLOS ALBERTO ALVES DA ROCHA
Presidente do TRE-MT

Desembargadora NILZA MARIA PÔSSAS DE CARVALHO
Corregedora Regional Eleitoral do TRE-MT







Índice

1) ABOEDA KUIREU,
MARAGODU MODE BOE
ERUGADU BOE APO 04

2) PADUWA PEMEGAWO
EMARAGODAEJI? 07

3) AWU JUSTIÇA
ELEITORAL 14

4) AWU PROCESSO
ELEITORAL 15

5) PEGA REU 17

6) BATARARODU DOGE 22

7) CHATBOT 23



1) ABOEDA KURIREU, MARAGODU MODE BOE ERUGADU BOE APO

1.1- Kaboba nure imi, kaboba bapera jiba imarogodu mode nowu barae emaragodae keje: woe mako mode kaboba nure pagi dukeje mako mode kaiba paedure.

Woe pamagomode du otodai awu barae emaragodae bapera kurireuji, dukejere pawia godu modukare kaboba nure parugadu boe, nowu pago bakaru, paeda rogure!

Padumode toro nowu boe ewadaru oto pa ka dukeje, paduwamode nowu ewadarure jiboeji boe doge pai, egore ji emugure woe eda reo. E Gore boe kurireuge nure emage, woere eno bakaru jeture, woere towujedure awu tuieda keje.

Aduware ako bakaruji?

Imedure ure to bakure towuje, tuiduwawo boe nure pudumi duji, tuioduware kaiba tumugure dukeje. Parugadu boe pabadure pamaedae keje, pamaragodae keje, pagare pureore pamedae tabo. Dukodire Boe nure pagi, paro rogu boe tabo.

Kaboba jiba egore Boe ero kurireu aino?

Awu boe ero kurireu egore aino ji: awu paro rogu padure pumekejedu rogu boe jire egoino, paro kare nono pamedage boe pegareuge ero magadure, pare paginoi epeiiji emage jamedu ere tuginoi pabiji dujire egoino, paduware Boe nure pagi duji.

Makaguragare imode ia rogu boe bu awu bapera keje, pawadarure tuginoi, pagoroe ure tugina, paro boere tugina Boe nure pagi kodi, dukodire

pagare nono nowu pamedage ereore.

Paduwo kaboba nure pagi, nowu inodure pemegare, pemegare jamedu nowuia pamedage eduwawo kaboba nure pagi emeatoruwo pai jamedu.

Ioduwawo kaboba nure imi, ioduwawo ino bakaru ji, iwobe eno bakaru ji, dujire egoino ikawo akedudo imagowo tabo, awu paro rogu boe tabo.

Paduwa mode kaboba nure pagi dukeje, pagire paduwa mode paetuwo tu pai rugadu, dujire egore pagie paduwa mode kaboba jiba pagaidumode meri jameduji, paduwa mode paetu pemegawo tu pai rugadu, dujire egoino tameruwo ika tabo tagina, godu.

Woere pamago mode nowu pamaru mode barae eimejera bagai duji!

Pamago mode nowu paemaru mode duji, pamago mode kaboba nure pagi jamedu, boe ero, kaboba baigaba pagao mode.

Boe emuguwo ebo, boe eduwawo kaboba jiba emaragodu mode nowu barae eimejarege ewogai dukeje, boe eduwawo kaboba maragodu mode boebo, boe eno bakaru tabo.

Mare kaboba jiba egoino rugadu?

1.2- Nowu inudu jire emaragodu mode boe rugadu boe apo, pabadure ji pawugeje pamedae tabo, pagare pureure.

Pamago mode du otodai nowu pamara godae, boe rugadu boe apo duji, dukejere pamago mode kaboba nure pagi.

Ainore egore ji nowu boe, braedu marogodae kuri jikore nowu tuieda keje, dukodire judumode nuba turo mode, nuba tumaragodu mode, aiwo pemega mode nowu tumaragodaeji.

Kaboba bapera jiba maragodu mode?

Nowu imedu maragodae bapera kurire rugadu emare umode udo turugadu, emare joduwa mode nuba turo mode pudabo, kaiba turagoje pemega mode! Imeduwo pudumi tuioduwawo kaboba jiba taidure pudai, tugodu pemegawo, turagoje pemegawo. Tuioduwawo kaboba pemegare boe erugadu boe etai: joduwa mode kaboba baraedu eimejera pemegare jetu mode boe, tuwo boe emaragodudo, jetu mode boe epega godu keje.

Dukejere joduwa mode tumarago duwo boe erugadu boe apo, joduwa mode boe kare ji pureore duji, boe padure pumekeje tumeadae tabo, turo rogu boe tabo, pamagaguragare pagi paduwa mode paamaruwo igiduba pagimejera mode ema, paamaru pemegawo, pagaiwo pemegawo.

Dukodire boe ero rogu kurire, paduwawo kaboba nure pagi, kaboba pamedagere emage dujire egoino paduwawo kaboba nure parugadu boe.

Kaboba jiba egore boe ero kurireu aino?

Nowu egoino jitu boe rugadu boe ero rogu makare, boe eragudu boe emeatoruwo ji akedu kawo, boe emago ji, boe emeru pemegawo toro nowu barae kurireuge eda kao, boewo tumugado toro ebo jamedu, eduwawo pawogai, pawo padurudo parugadu boe paru tabo, nowu barae eduwawo boe pawogai, pamaga guragare kodi.



Uwo pamago pemegawo imago mode awu baraedu bapera atugoji Boaventura Souza Santos:

“Paduruwo parugadu boe ai, nowu barae emago pega mode pai dukeje, paduruwo awu pabadure pumekejedu rogu boe ai, nowu barae emago pega kigodure pai kodi.”

Tagerabararedo! Taduwa pemegawo!



2) DIREITOS POLÍTICOS

2.1- Woere paduwa pemega mode emaragoda-e jamedu boeji?

Dujire egore bapera kurireu boe erugadu boe etai, boe eduwawo ji kaduwu bapera ba maragodu mode parugadu boe apo, paemaru mode igiduba nowu barae eimejera kurireu mode ema dujire emagore awu bapera keje, nowu atugudodureu bapera mugure nowu barae eimejera kurireu apo, boe erugadu boe eduwawo igiduba tugimejera mode ema, barae eimejera mode ema muguwo toro.

Maragodu pemegawo nowu ture towujeu bapera tabo, joduwawo kaiba tumode nowu to bapera reko, makare ai emare joduwa mode kaboba bapera pemegamode tuwo towuje, umode to bapera towuje dukeje aidumode barae eimejarawo pudumi iadukeje tuiemaruwo igiduba barae eimejera mode ema, nowu o baperare kodi.

Nowu o bapera bokaereu, bapera pemega kareu romodu kare nowu tumeduia romagadure, aidumode barae eimejarawo pudumi mare o bapera kare turugadu umodu kare ema.

Dujire egoino boewo to bapera towuje boewo tugera bararedo ei, boe eduwawo nuba boe mode pudui ia meri keje?

2.2- Boe enowo ema, Boe etai

Awu paeda kurireu Brasileiro ure tugeragu ia baperaji tumarogodu boe rugadu boe apo, dujire egoino boe eduwawo igiduba tugimejera mode ema. Nowu boe eimejera mode emawu boe erumode tudo pui tuwo vota, boe eduwa mokare kaboba jiba tumeduia ure vota, dujire egoino nowu inodure boe pagai, barae etai jamedu ure pureore.

Toro nowu barae eda kurireu keje, nowu Estados Unidos keje emaga jokodu mokare emagere eduwa mode igiduba tugimejera mode ema. Dujire egore eno voto utie tugimejera mitodu ae nowu inodu pemegare. Woe awu paeda kurireu Brasil keje ero kare ainono parugadu boere pagaiwo mode igiduba pagimejera mode ema.

Nowu boe eno voto biadodure boe eduwa mokare kaboba jiba tumeduia roino, ekorigodu kawo pui dukodire boe eduwa mokare, Boere eduwa mode tumedae tabo igiduba jiba tumode vota, kakuduwu ba umode tugera bararedo boe, pemega mode boe.

Akedure tugeje, nowu voto umode nono pureore boe eiamedu boe ai, uwo turugadu, uwo pureore, uwo nono umagadure nowu bapera kurireu keje. Mare ia dukeje ukigodu kare ainono. Marigudu areme, barae joreuge, boe doge ekigodu kare edo vota. Marigu tu emagere ere emode nowu bapera towuje, ia dukeje emode edudo to bapera ji barae kurireuge nure pudumi duji, dukejere emode edo vota ia dukeje etaidumode pudumiwo barae eimejare pudumi jamedu.

Dukejere boemagadure nowu inodiji dukece, ere udu turugadu barae, boe erugadu boewo eduware igiduba tugimejera mode ema, mare emagere ere tudurudo puwawo nowu inoduwo akedu kawo, parugadu boe paduwo nuba eromode awu paeda keje.

Dukodire nowu inodu akeudu kawo boerugadu boe ai, boe eduwawo nuba turomode kaboba jiba tumode nowu to bapera maku, kaboba jiba tumode vota ia dukeje emode vota puduiduji jamedu, dukodire nowu barae ere ia bapera atugodo boe eduwa pemegawo nuba boe emaragodu mode (barae eimejar-ege, kaiba eragojere, nowu maragodure barae kurireuge apouge). Emagere eduwa mode nuba boe ero mode nuba turomode nowu tumaragoda-e keje, makare kodi, eduwa mode nuba turawo nowu barae eimejarege ei, etaiwo mode eno bapera pemega mode tubogai, ainore emaragodare.

Ure aino dujire egoino emode bapera atugodo merire rereu bogai, boe eke bogai tuwo maku nowu boe emaru mode tugimejera bagaiwu meri keje, mare nowu barae eimejara kurireugere emode maku maragodure nowu tabouge. Eroe ainono nowuia barae kawo boe emerudo pudawo, boe enogagedo boewo vota pudui dubogai, ia dukeje emagode ia tumedaji pawigai dujire eroino.



Awiaogodu kaba nowu barae mode tugie mugudo toro dukeje, akaiwodo ei nowu meri aregodu mode toro duka, nowu ure tugie mugudo torowuge etaiwo mode, emaragodu pemega mode, etaiwo mode nowu bapera ji tumaragodu pega kawo taiwo tabo boe ewogai ewo vota pudui, nowu emarogodae pemegawo boe rugadu boe apo. Akaiwo pemegado nowu akaidure awo barae eimejerado emau maragodu pemega mode dubogai, maragodu pemega mode ainono rugadu romode pemega mode.

Amorora magadu kaba nowu barae kurireuge emokare boe ewie igiduba jiba are vota emode biado nowu meriri mugu mode nono boe eduwa mokare ji, emaragodae pegakare nowu meriri rereu bogai, boe eke bogai, etaiwo mode nowu batararodu doge ewogai, etaiwo mode nowu barae epadure kejeu bapera bogai, boe kawo turemo toro tabo.



Nowu eno meriri meki mokare baiporo jagawai nowu boe edureu keje? Eore ainono boedu kawo igiduba jiba pure vota, kodumode nonowuge edu kawo nowu votagão ji.

Aki jamedu, aki eleitor ia amaragodaere jamedu nowu ako bapera tabo. Dujire egoino akera bararewo pudui akaiwo tabo batarodu modeuge ewogai ema paga kawo, nowu inodu doge emgare tumo paga paga tabo, edurure boe eda jamedu boeji. lare pugeje nowu barae eno meriri makoreuto paigawo pemegawo ji kaiba aregodure mako pemega mode du bogai, ukawo paekuri pagodo dubogai. Emode ia bapera atugodo pawogai pagaiwo pemegawo ji, ure turugadu dubogai, nowu inodu boe ia dukeje ia jadowa bokareu utu-mode nowu emadae rekodaji erabodure boedo paga biagai, nowu inodu pemega kare. Dukodire egoino pagi pagaiwo pemegawo? Tagaiwodo woe

awu bapera keje nowu batarodu jiboe padure awu bapera keje.

2.3- Woere paduwa mode kaduwu bapera eleitoral kejewu ba pemegare

Awu egoino jiu bapera keje umode paduwado nuba eremode du bogai, ia dukeje emare jamaru mode igiduba tugimejera mode ema, aidumode pudumiwo jamedu pega kare. Nowu kodure boe tojiu ure aino emaie jamaru mode igiduba tugimejera kurireu mode ema muguwo toro barae eda kurireu keje, mare boere emode vota ji du rekodaji mugu mode toro nowu tumuga kurireu keje.

Awu metuia keje ure aino adimode dukeje puduiwo boere vota, turagojewo toro pega kare jamedu. Nowu o bapera pemegare nowu inoduwo pudumi barae eimejera kurireuwo ema rakoje toro nowu barae kurireuge eda keje, ainore ure awu bapera keje.

Igiduba umode, igiduba umodukare vota?


Nowu egoino jiwu bapera ainore ure, awugere emodode towuje, awu o jurure ainouge 18 anos, nowu joduwa kare bapera jiuge emage rema etaidumodukare emokare to bapera towuje, nowu o jureru 16 nowu 17 anos doge jamedu, nowu pao pemaga doge jamedu nowu joru kodure 70 anos doge.

Umodukare nowu to bapera towuje eleitor uwo pudumi (dukodire o bapera modu kare) nowuia baraedu tuginoiwu mugu jare torou, (nowu emagore bagai muguwo toro nowu aiabowa doge ebou), mugu mode toro nowu aiabowa doge ebo tumaragodu tabo jamedu. Igiduba umode turemo nowu inoduto umodukare nowu to bapera towuje. Nowu umodukare to bapera towujeu umodukare vota jamedu, o bapera bokare kodi.



Ariwa modukare atuwo toro awo vota dukeje (akogodure dukeje, dujire akoino) amago-mode ewo ako bapera towuje akawo vota pugeje? Dukodire nowu rare ainonowu morora magadu mokare tuwo vota pugeje.





Igiduba umode, igiduba umodukare turemo barae eimejerawo pudumi?

Nowu Constituição Federal keje padure nonore boeduwa mode (kakuduwu ba o bapera pemegare nowu inoduwo pudumi) Ainore umode:

- Muguwo woe Brasileira
- Bapera pemegawo maragoduwo toro
- Bapera eleitoral
- Rakojewo nowu to bapera eleitoral towujedureu keje.

18 o juro Eimejera Vereador

21 o juro Eimejera Deputado Federal, Deputado Estadual, Prefeito e Vice-prefeito

30 o juro Eimejera Governador e Vice-governador

35 o juro Eimejera Presidente, Vice-presidente e Senador

Nowuiage (nowu barae tuginoi wuge, mugu kare woege) joduwa kare bapera jiwuge, nowugere emodukare turemo awu inoduto barae eimejera kurirewo padumi, eduwa mokare tumarago duwo kodi.

Ia lei ure jamedu nowu kejere eduwa mode nuba turomode, ia boe, barae etaidumode tuwo turemo nowu inoduwo etaiwo pemega mode o bapera ji, ia dukeje bapera pemega modu kare ema jamedu umakare turemo nowu inoduto barae eimejerawo pudiwo. Dukodire ere awu bapera towuje etiwo pemegawo ji dujire egore aino Lei kejewu 64/90, ere towuje pugeje Lei ekie pemegawo (Lei towu-jedureu 135/2010). Dukeje etaiwo mode nuba ure nowu lei keje dujire egoino.



Nuba eromode tuwo candidata?(bapera candidatura)

Nowu bapera candidatura (RCAN) nowu kejere padure o bapera pemega mode candidatuwo pudimu dubogai. Eгоре RCAN umode towuje, umode atugodo tuwo nowu Justiça Eleitoral kejeuge edudo ji, nowu mode o bapera kurireu boe padu mode keje jamedu, joduwa mode bapera jitu bogai, iage pugeje.

Nowu bapera keje jodu mode kuri je:

- Etiwo mode nowu bapera ji pemega mode dubogai;
- Etaiwo mode ji nuba ure pemega mode, nowu inoduwo pudumi dubogaire eroino ji.

Dukeje nowu Justiça Eleitoral kejeugere etaiwo pemega mode ji, etaiwo akedu mode jitu keje emago mode ji ure turugadu.



Umode to bapera tuwuje dukeje nowu inoduwo pudumi barae eimejera , nowu maragodu mode apouge emetoruwo ji egowo ainore ure? Emodukare ime emagado ia dukejere areme emagado emode edo pureore ei pobedu ai nowu inodure pemegare, ainore umode 30%, ia dukeje ainore umode 70 %.


2.4- Muguwo Eleitoral?


Ainore ure awu brasileiro doge, boe doge eiamedu boe enore 16 joru dukeje emagere emode vota. Mare emage jamedu emode to bapera towuje nowu eleitoral, nowu tabore etumode toro eno bapera boe tojiu reno kodi, woe brasileiro.

Nowu bapera towujeduwo etumode toro nowu bapera jeta eleitoral ka, ia dukeje atumode bapera jeta cartório kae, ia dukeje atumode posto eleitoral nowu amugure kejeu barae eda keje, akaidu- mode atuwo toro dukeje, nowu maragodure, nowu inodu jiu aiwo mode ako bapera ji, umode turugadu du bogai dukejere umode maku toro juiz iadukeje juíza eleitoral bogai emagere etaiwo mode ako bapera ji umode turugadu du bogai.

Iadukeje akaidu mode amagowo nowu ako bapera bogai internet jamedu pega kare, amode nowui bapera atugodo akie tabo ako bapera kurireu tabo jamedu, atumodukare toro Justiça Eleitoral ka, awu egore titulo net, emode aduwado mato nuba aromode awu towuje, aduwa modukare awo towuje dukeje ia cartório kejeu mode aduwado, whatsapp tore amago mode ji uwo aduwado mato (amode awu link mugudo toro umode eno meriri makore maku mato awogai nowu whatsapp cartório kejeu).

Rakakare akaiwowo bogai titulo net keje, akaiwo mode bogai adumode kuri ji rugadu awu via QR code tabo, ainore umode:





Awu Kurireu!! Marigudu joru keje nowu eleição keje, nowu ari kejeu maio nowu novembro, emodukare nowu bapera eleitoral kejeu towuje pugeje, emodukare atugodo, emodukare maku boe etai, etaiwo mokare nowu bapera eleitor pugeje.

Iadukeje nowu eleitor aidu mode tuwo to bapera towuje toro Justiça Eleitoral keje, utumodukare toro Cartório Eleitoral kae. Nowu bapera towujedu mode internet jamedu, ainore umode awo links keje:

Nowu bapera keje eleitoral nowuia egore crimes eleitorais, ainore umode: 1) eleitor ie paduwo; 2) nowu numero do titulo eleitor ia dukeje CPF; 3) buture kejeu joru paduwo; 4) uce ie paduwo (umode dukeje), 5) uwo ie paduwo (umode dukeje).

Nowu mugu mode kejeu jamedu, umode edudo nowu numero bapera eleitoral kejeuji.

Nowuia bapera ie mugure kejeu, ainore umode: 1) eleitor ie; 2) buture kejeu joru; 3) uce ie (umode dukeje); 4) uwo ie (umode dukeje).

Awu bapera bogaire etaidumode

1) ako bapera kurireu apadu mode keje jamedu.

2) kaiba amugure maigodu aino du bogai, ia dukeje awui bapera metuia jamedu.

3) Nowu bapera moridodu mode du bogai Justiça Eleitoral keje.

4) Bapera mugure ai bowa doge Ebowu pemega mode du bogai lmedu bapera umode 18 kuri 45 joru kae (umode dukeje Etaiwowo mugure nowu ai bowa doge ebo dubogai).

AKAIWODO: akaidumode awo nowu ako bapera towuje pega kare, amode towuje no eleitor kejeu.

Comprovantes de domicílio eleitoral (indígenas)

1) Bapera Funai kejeu amugu mode boe eno moto tada du bogai;

2) Ako bapera amugu mode toro batada, bapera keje etaidu mode bogai;

3) Nowuia bapera umode pure-ore du bogai jamedu, mugu mode boe eno moto tada du bogai;

4) Bapera towujedu mode nowu judicial keje du bogai, kaiba rakoje rugadu, eduwawo eleitoral keje;

AKAIWODO: nowui boe doge emugu mode tu nowuia tuieda keje, nonore buture nowu moto kejeu nere ema rugadu, ema umode to bapera towuje nono rugadu nonou nure ema kodi pega kare uwo to bapera towure.

Ako bapera boe eno

Ako bapera kurireu apadu mode keje jamedu ia dukeje boe boka mode pega kare.

Caso o eleitor indígena não tenha tal documento, poderá valer-se da carteira de identidade administrativa expedida pela FUNAI, desde que possível a aferição da nacionalidade brasileira e sua filiação.



Nowu eleitor mugu mokare, nowu to município tukigodure votau keje mare pega kare, mare etaiwo mode ia oroe boe jetui nono du bogai, uwai mode nono du bogai, maragodu mode du bogai, uwobe edu mode nono du bogai? aino nowu leitor maragodu mode nowuia município keje, tumugure kejeu keje jamedu, emare joduwa mode kakudu kejeba tumode vota.

3) AWU JUSTIÇA ELEITORAL

Woe Brasil keje, ia justiça epagere emagere eduware nowu eleitoral jiboeji, ainore nowu Justiça Eleitoral kejeugere:

- I - Tribunal Superior Eleitoral (TSE)
- II - Tribunais Regionais Eleitorais (TREs)
- III - Juízes Eleitorais;
- IV - Juntas Eleitorais.

Nowu TSE nowu TREs emagere ere 7 jamedu boe keje, emaragodae makare etai, ainore ere ministros do STF, STJ, Desembargadores, Juizes Federais, Estaduais e Advogados. Nowu juiz toro nowu eleitoral kejeu marogodu oto padure kejedure aino 2 joru, iadukeje aidumode tumuguwo pugeje kodu mod ekuri toro oto padu kae pugeje.

Emode nowuia Tribunal Regional Eleitoral mugudo toro tuida kurireu keje, ia mugu mode toro Distrito Federal keje. Woe paeda

kurireu keje TRE mugure lkuia pa keje.

Toro nowu eda kurireu boe keje ere udo taodo pubiji zonais eleitorais boeji. Nowuia zonas eleitorais oto padure município o moto oto pa keje, ia dukeje kodure toro nowuia município ka jamedu, ia dukeje zona eleitoral maka mode município boeji.

Nowu zona eleitoral boe keje ia juiz iadukeje Juiza Eleitoral, kaboba nowu Juiz ia dukeje Juiza Eleitoral, emagere emaragodare nowu inodu.

Nowu Zona Eleitoral boe keje, jamedu nowu Cortes Eleitoral, ia mode mito nono nowuia Ministério Público Eleitoral kejeu, ia promotores, ia Procuradores Eleitoral, emagere emaragodu mode etaiwo mode nowu tumedage ei, toro akedu mode du kae.



4) AWU PROCESSO ELEITORAL

Awu eleitoral ainore ure, paru towujedu mode nowu convenções partidárias, nowu kejere etaiwo mode igidyba tumude mugudo toro pudai, kaduwu ba iera barare mode pudui, jamedu igiduba tumea toru mode ji tugime-jerawo ema toro. Nowu convenções doge emaragodu mode nowu 20 de junho kuri toro 5 de agosto ka joru eleitoral keje.

Etaiwore igiduba tumea toru mode ji mugowo toro du keje, ema rugadu emode o bapera towuje kuri toro 19h meriji dia 19 de agosto nowu joru eleitoral, emode nowu tumea torure jiuge eno baperado turugadu.

Nowu meri kodumode 15 de agosto rekodaji, dukejere emode nowu tumara godae eleitoral towuje, nowu tumedage ebo, emaru mode boe ewogai tumagowo boe, emode boe edudo nuba dumaragodae mode, tumago tabo boewo vota pudui.

Awu tumara godae propaganda eleitoral keje nowu partidos políticos doge mode, nowu ere tumea torudo jiu umode eleitor doge edudo tumeadae boeji, nuba turo mode tumara godu tabo, boe emea toruwo pudui, boe eno voto bogai jamedu kodire eore ainono.

Makaguragare nuba erowo nowu to propaganda eleitoral ji, etaidu mode tuwo nowu propaganda eleitoral bu bapera keje, toro internet keje, meriri makoreuto, iadukeje meriri aiworeuto, jamedu etaidu mode tumeruwo tabo jamedu pega kare, emagere eduwa mode nuba turo mode nowu tumara godae tabo. Meriri makoreuto, meriri aiworeuto, epaga mode meri aregoduwo toro kae dukejere emaragodu mode nowu inodu tabo jamedu, kuri toro nowu eleição otodai.

ADUWARE egoere propaganda outdoors tabou, nowui showmícios tabou ukigodu kae nowu inodu akeduie marigudu awu legislação brasileira keje.

Woe Brasil keje, joru mode pobe du rekodaji, emode nowuia eleição towuje pugeje, emode

nowuia eleição towuje boe rugadu apo, iadukeje emode nowu eleição municipais kejeu towuje.

Kodu mode boe tojiu eleição, towujedu kigodure boetojiu domingo keje, toro outubro keje, nowu eleição o joru keje. Nowu município kejeuge ekodu mode 200 mil eleitores kori dukeje, ia dukeje nowu candidato doge etaregodu mokare boe eno voto otopadureu ka dukeje, emode ia towuje pugeje du jire egore segundo turno de votação aino. Nowu inodu mode dukeje emode towuje kodu mode boigoduwo domingo keje toro outubro keje.

Nowu inodu keje, emode pobe nowu o voto makareuge, dukejere boe mode vota ei pugeje, mugu modeu mode mitotuje, emare o voto makare kodi mugu mode.

Nowu eleição umode boe rugadu boe apou keje etaiwo mode igiduba tumea toru modeji Presidente da Republica (e Vice-presidente), Governador de Estado (e vice-governador), Senadores (e dois suplentes) Deputado Federais e Deputado Estaduais ou Distritais (apenas no Distrito Federal). Awu eleições municipais keje etaiwo mode igiduba Prefeito doge mode emage (e vice-prefeito) vereador doge.

Nobu pobe puibiji joru kejere, emaru mode pugeje, mito ia dukeje pobe senadores. Ainore ure kodire etaiwo mode nowu tuieda kurireu boe keje toro Distrito Federal keje umode ainono jamedu aregodumode pobe puibiji joru kadu keje.

Emuga boe makare etai, emuguwo keje, dukodire ere nowuia bapera towuje nuba turomode votação keje: eleição boe eiamedu apou keje, ainore umode: 1º) Deputado Federal, 2º) Deputado Estadual, 3º) Senador e Suplentes, 4º) Governador e vice-Governador e por fim, 5º) Presidente da republica e Vice-presidente. Nowu eleição municipais keje ainore umode: 1º) Vereador dukeje, 2º) Pefeito e Vice-prefeito.

Nowu candidato doge eno numero,
nowu aidure tumuguwo torouge
Presidente da Republica, Governador
e Prefeito nowu eno vice doge, eno
numero nono nowu tumedui boe
tojiu o numero magadure, (umode
pobe). Nowu candidato aidure
senador pudumiu metage boe eno
numero pereore jamedu, kodure boe
tojiu o magadure (pobe metuia
bokare). Nowu candidato Deputado
Federal o numero mode nono tumu-
gure apouge eno numero magadure
(pobe puibiji) nowu candidato Dep-
utado Estadual, Distrital nowu
Vereador emage eno numero mode
nowu tumugure jagaiuge eno
magadure jamedu ainore umode
(pobe puibiji metui bokare).

Nowu votação mode urnas eletrôni-
cas dogeto, emagare tumaragodu
tabo aniore ure 46 boe edaji mak-
aguragare toro boeda jameduji. Awu
urna eletrônica mugure woe towu-
jedure woe Brasil keje rugadu, bra-
sileiros dogere towuje toro 1955
(kodure 25 joru piji), emaragodure
tabo eleições municipais de 1996 por
eleitorado mariguduege ebo. Ainore
ure ikerare pobe puibiji joru keje,
dukejere kodure boe tojiu pleito 100%
informatizado, nowu urna eletrônica
tabo boe eda jamedu boeji Brasil
keje.

Nowu urna bapera kurireu pore
tabou emaragodu kigodure, mare
nowuia boka mode rugadu dukeje
emaragodu mode tabo, nowuia
pemega mokare dukeje, ataiwo
mode ji nuba umode pemega mode
dubogai, ia dukeje emode boedo
vota bapera keje rugadu, nowuia
boka mode dukeje.

Etaiwo mode nowu votos boeji
akedumode urna kejeduji. Etaiwo
mode ji nowu eletrônico aino jibeto,

5) PEÇA REU

Emaragodu peme gawo eleitoral keje uwo pureore emode nowuia bapera atugodo nuba turomode emara goduwo pureore, nuba Justiça Eleitoral maragodae mode eleitoral keje.

Nowu inodu kodu mokare emeadae jitu keje, nowu meatoru bokareu emago mode ji emode tawuje, kodukare Justiça Eleitoral ure towujeu bapera ji kodi.

5.1- Ainore nowu infrações ure

Ainore umode pobe metuia bokare:

1) Infrações eduwa kare tumara godu pemegawo:

nowu inoduji egore infrações raka kareu, dukeje emago mode nowu rore ainoji uwo morido, nowu inodu akeduwo.

2) Infrações eduwa kare tumara goduwo cível eleitoral:

nowu inodu jire egore infrações kodu mokare ere towu bapera rekodaji, nowu processo eleitoral ure towu bapera, umode to propaganda towuje boetoji, nowuia candidato romode ainono du keje propaganda towuje nowu eno meri aregodu mokare kaedukeje, umokare nono nowu bapera kurireu keje, etaiwo mode ji ro pega nure nowu tumedage ei kodi, bia paga kare nowu bapera kurireuji.


Nowu infrações mode emaetoru kare nowu bapera ji kodi etidure turowo tumedae tabo, nowu inodu pemega kare umode boe emetorudo pudui, umode nowu eleição kodu pegado pudui, dujire egoino awu bapera keje.

3) Infrações eduwa mokare criminal eleitoral:

nowu inodu jire egore infrações pegareu nowu estado ai. Nowu inodu jire etaiwo mode emaragodu pegare kodi, awu Justiça Eleitoral kejeugere etaiwo mode nowu inoduji emagere eduwa mode nuba turomode, ia dukeje emode edo morido, ia dukeje emode tawuje nowu inodu piji politico mokare ema pugeje ro pegare kodi, umodu kare vota jamedu ere tugeragu o bapera ji piji, emagere eduwa mode kaboba keje ba tumode bapera maku ai pugeje.

Nowu ero pegareu boe eleitorais keje dujire egore incondicionada, mugure toro nowu Ministerio Publico Eleitoral kejeugere eduwa mode. Iadukeje etaiwo mode edu mode pegajokodu kare duji, emode ia maragodae maku ai joru mode pobe nowu inoduji.

Nowu inodu pegawo rugadu, etaiwo mode kaboba ure pegado, kaboba maragodae ba pegare, jamedu nowu egoinojiu mako mode tuwugeje, Nowu maragodure nowu inodu jiuge Ministerio Publico Eleitoral, etaiwo mode kodiba rore ainono, kodiba maragodu pegare, kodiba aidure nowu inoduwo pudumi turo pegawo, dukejere Promotoria Eleitoral kejeuge eduwa mode nuba turo modeji. Etaiwo pemega mode o bapera ji, iadukeje emode maragodudo pobe, pobe metuia bokare joru, iadukeje emode udo morido meriri tabo emode udo maku toro nowu barae eda ka, idukeje emode maragodudo boetai.



5.2- Ainore ure ero kawo ainono

Ure pobedu ero pegareu padure bapera keje marigudu joru keje, nowu Sistema de Registro de Ocorrências Penais e Inelegibilidades – SIROPI dujire egore propaganda uwo eleição meriji, nowu egore boca de urna, nowu inodu etaidu nure tuwo meriri maku boetai, tuwo akirodo boeno voto ji.

Etaidumode tuwo tumedage emaragodae pegado eleitorais keje

Nowu Justiça Eleitoral mode ia bapera towuje nuba turo mode tumaragodu tabo, nowu eleições keje, umagadure ture towu bapera keje. Emodukare boe mugu kiorodo tumago tabo nowu inodu pemega kare, dukodire ere ia bapera towuje nuba uwo votação keje, padure legislação keje, iadukeje emode boedo tudo pui emodukare nowu eleitorais kejeuge emaragodudo, nowu inodu pegare dujire egore conduta criminosa aino.



5.2- Ainore ure erro kawo ainono

Boca de urna jire egoino eleitores doge eduwawo, iadukeje propaganda eleitoral nowu eleição mode jiwi meriji

Nowu meri keje eleições mode jiu, iaboe moduie mitotu je tumagodabo, mako raka modukaie eleitor, aidumode tuwo to candidato adesivo bu tuwugeje taidure jiu, mako raka mode boe rugadu boe emeduwo nowu inodure pemega kare, mako mode voto bogai jamedu, umode propaganda towuje boewo vota nowu taidure jiwu tumeduia ai, nowu inodu pemega kare.

Nowu voto emagowo bogai iadukeje ewo propaganda eleitoral towuje, emago raka mokare iadukeje emago raka mode nowu inodu mokatere, padure legislação keje ero kawo ainono, toro 22:00 horas meri keje iadukeje meri kodure nowu votação otodai ero mode ainono nowu inodu pegare. Ero kawo ainono, ia lei towujedure eleitor doge etai epagudu kawo taiwowo igiduba to candidato mode ema.

Etaidure turo pegawo dujire egore quebra do sigilo do voto

Nowu inodu padure bapera keje processo eleitoral ainore ure tu boere eduwa mode igiduba ai ba tumode to voto maku. Nowu inodu padure Constituição Federal keje, jamedu padure Código Eleitoral keje, epagudu kawo dubogai legislador ure udo aino, ropegareu aidu nure tuwo pegado nowu sigilo do voto. Nowu inodu aregodu mode eleitores doge erugadu boe ai. Iadukeje emode nowuia câmara mugudo seção eleitoral keje aiwowo, tuiduwa pemegawo nowu eleitor dogei, erro pega mode du bogai.

Votar iadukeje aidumode tuwo vota pugeje, iadukeje tuwo vota ia boe emugadou

Nowu ie mugure torou eleitor uwo pudumi, ema bapera pemegare dukodire umode vota, aiwo mode ere towu baperaji. Ainore ure dukodire ure votau umodukare udo pugeje nowu eleição mitodu keje. Nowu bapera keje padure aino ia boe motuie mito, jamedu voto mode mito. Iadukeje aidumode tuwo vota ia boe emugado, aidumode tuggeduwo tumeduia o baperaji, nowuia eleitor baperaji, nowu inodu ropega nure, aidure turowo ainono kodi.

Transporte irregular de eleitores

Meri puredugodu mode votação kae dukeje, iadukeje rekodaji, tu nowu Justiça Eleitoral dogere emago mode meriri rereu tabo eleitores dogei, etuwo toro votação mugureu ka. Ainono, meri jiu eleições dukejere Justiça Eleitoral mode bapera towuje tuioduwo kaiba meriri rereu kodu mode eleitores doge ebo, ero mode ainono mugure toro boe tadauge ei, emugu jare toro kodi, iadukeje emugu mode 2 km nowu votação mugureu piji. Eroro ainono emago kawo eleitores dogei, tuie erego dukeje.



nowu inodu kodi, ero pega nure emode meriri aiwodo urna ji umode bapera towuje dukeje nowu voto?

5.2- Ainore ure erro kawo ainono

Emode boedo paga paga ewadararodu mode boe ewigai nowu propaganda tabo iadukeje campanha eleitoral keje

Emago mode nowu propaganda eleitoral, iadukeje tumode towu campanha eleitoral keje, ewadararodu boe ewiagai nowu to partido doge iadukeje to candidato dogebo, etaidu nure tuwo boe etudo tumedae rekodaji nowu eleitorado keje. Etaidu nure turo pegawo boe, nowu inodu keje boe etaiwo mode kakuduba mako pemegare.

Jamedu woe, 2021 keje ere ia bapera towuje dujira egore Lei n 14.192/2021, jamedu padure nowu bapera keje umode meriri aiwodou tuwadara rodu tabo, tuwo maku ia dukeje moridoduwo pudai, tuwadararodu tabo to

partido ai, tuwo maku eleitores doge etai. Nowu inodu pemaga modu kare rugadu batararodu mode meri makoreuto, meriri aiworeuto, internet, mako pega mode areme ei, mako pega mode boe dogei jamedu.

Awu maigodu meriri pemegare rugadu, aiwo mode nowu batara rodu doge ewogai. Nowu inodu keje emago pega mode pui mugu mode nowu inodu tada, etaiwo mode toro ji mako boeji tuiduwawo nuba akore batararodu kare-gure dubogai, nowu to propaganda eleitoral keje iadukeje to campanha keje, emago paga kawo.



6) BATARARODU DOGE

Tuwo nowu inodu akedudo emagere amaragodaere ema Justiça Eleitoral. Nowu emaragodure tabou pemegare awu tumedage epiji, mare nowu urna eletrônica etaidu kigidu tuwadaroduwo ji, tumago paga tabo nowu inoduji. Dukodire egore urna eletrônica mugudodure woe Brasil keje 1996, egore edu kare nowu ero paga mode nowu urnas eletrônicas dogei.

Woe awu bapera kejere paduwa pemega mode nowu ewadararodae jiboeji, ere barigu toro rede sociais e sites não confiáveis.

Aduwado, mato ceda pawo nowu inodu.

akedudo ewadararodu!

Tagaiwo pemegado Urna Eletronica ji

Batararodu doge: nowuge emago paga mode, ego mode aino urna eletrônica pemega kae, nowu tumedage etaiwo moduie ji internet tabo.



Boe Jokodu: Nowu sistema urna kejeu criptografia meture tada tukodire ekeramagudu mokare ji, jamedu ia mecanismo de segurança meture tada, nowu inodu mokare eriwado tugera magaduwo ji. Nowu urna eletrônicas doge emedure internet tada, dukodire eriwa mokare tugera magaduwo ji, tuwo udo tuginoi eriwa mokare ji.

Batararodu doge: ia boe doge egomode nowu urnas eletrônicas umodu kae registra nowu voto boeji.



Boe Jokodu: Nowu Justiça Eleitoral mode votação towuje eleição mode jiu meriji, tuioduwa pemegawo nuba votos mode registrado nowu sistemas to dubogai, nowu ere digita urna todú. Nowuia urnas mode sorteados tuidu pemegawo nuba boe mode vota to dubogai, taiwo peegawo ji pemega mode du bogai. Dukeje nowu mugure torouge etaiwo mode nuba ure umode nono computado tadau magadure ainono pemegare rugadu.

Batararodu doge: iadukeje egomode votos modukae resgistrados nowu urnas eletrônicas tada ekeramagadu moduie ji.



Boe Jokodu: Urnas doge moduie boletim tawuje nowu votos doge enodo pa keje, votação akedu keje, egore boletim de urna aino ji. Mugu wadu mode boe rugadu boe edu mode ji, boeduwo numero padure nowu bapera keje duji boletim ure nono pureure TSE keje.

Batararodu doge: Emago paga mode boe ewiagai egomode urna eletrônicas aiwo pemega modukae eleições mode jiu meriji iadukeje rekedajiu jamedu.



Boe Jokodu: Emaga guragare tuwo nowo bapera towuje nowu auditoria. Emage reo: Registro Digital do voto, Log da Urna Eletronicas, auditorias pré e pós eleição, auditorias dos códigos fonte, lacração dos sistemas, tabela de correspondência, lacre físico, auditoria de votação (Votação paralela) e oficialização dos sistemas. Ainono jamedu nowu sistemas aiwo pemega mode ji aidu mode dukeje.

Batararodu doge: lage emago pagare egore urna eletrônicas modukae recontagem de votos towuje.



Boe Jokodu: Ainore ure Registro Digital do Voto, ia tabela digital nure ema, nowu kejere emode votos jamedu boe mugudo, emode tugera jodo keje teclado nowu urna kejeu. Nowu inodu emode biado, eduwa modukare igiduba ure ema, mare emode biado ainono rugadu. Nowu inodu eduwa modukare igiduba ai ba eleitor ure voto maku. Nowu tabela mugu mode nono partidos políticos iadukeje entidade doge eduwo ji.




Awu site keje aduwa pemega mode nowu ewadararodu mode du bogai, emago pemega mode du bogai eleições jiboeji. Aduwa jokodu mokare, akaidu mode aduwa pemegawo nowu ere maku awogai baperaji redes sociais to, iadukeje nowuia site tuginoi wuto, akaiwodo awu keje:

www.justicaeleitoral.jus.br/fato-ou-boato

dukejere aduwa pemega mode. Nowu aiwo pemega mode agencias dogei woe Brasil keje, boe erugadu aiwo bogai.

AINORE UMODE



Awu Chatbot jire akiwo mode aduwa mokare dukeje nowu TSE o Whatsapp

Awu joruji rakaguraga kare pemegare nowu eleitoras e os eleitores doge eduwa mokare dukeje, etaidu mode tuiduwawo nowu eleições jiboeji nowu 2022 kejeu etaiwo mode ji nuba ure. Nowu Tribunal Superior Eleitoral (TSE) aregodure ia turo maidureu tabo nowu chatbot – assistente virtual towujedure nowu Whatsapp tabo, towujedure uwo boe eduwa pemegado nowu eleitoral jiboeji.

Aduwa pemegawo woere akaiwo mode nowu TSE o Whatsapp keje

Nowu bot ou robô virtual , ainore egore ji, umode boeduwado Justiça Eleitoral ji, jamedu o canal ure boe etaiwowo ji. Nowu inodu towujedure etaidure tuiduwo boe emaga mode toro dubogai , ewadara rodu kawo boe ewiagai, jamedu tuwo boe eduwado nowu Justiça Eleitoral maragodaeji. Ainore aro mode?



Boe etaidu mode tumagowo nowu assistente virtual jitu keje, boe mode nowu to câmara de celular aiwodo nowu QR code ji, nowu o baperaji, iadukeje boe etaiwo mode nowu o telefone + 55 61 99637 1078 nowu bapera bogai toro Whatsapp keje. Dukeje boe emago mode toro bogai nowu assistente virtual ji.



Corpo Diretivo do Tribunal Regional Eleitoral de Mato Grosso

Presidente

Des. CARLOS ALBERTO ALVES DA ROCHA

Corregedora

Desa. NILZA MARIA PÔSSAS DE CARVALHO

Ouvidor Eleitoral

Dr. JACKSON FRANCISCO C. COUTINHO

Diretora da Escola Judiciária Eleitoral

Dra. ANA CRISTINA SILVA MENDES

Diretor-Geral

MAURO SÉRGIO RODRIGUES DIOGO

Secretário Judiciário

BRENO ANTONIO SIRUGI GASPAROTO

Secretária de Administração e Orçamento

TÂNIA YOSHIDA DE OLIVEIRA

Secretário de Gestão de Pessoas

VALMIR MILOMEM SANTOS

Secretário de Tecnologia da Informação

DR. LUIS CÉZAR DARIENZO ALVES

Assessora da Presidência

CRISTIANE MANZANO MANOEL

Coordenador da Corregedoria

CARLOS LUANGA RIBEIRO LIMA

Coordenador de Controle Interno e Auditoria

DANIEL RIBEIRO TAURINES

Assessora de Comunicação Social

ANDREA MARTINS DE OLIVEIRA

Assessor de Plan. e Gestão Estratégica

ANDRÉ LUIZ RÉGIS EMIDIO

Assessor Jurídico

LÉO MONTEIRO COSTA E SILVA

Ainore ere Coordenação Keje

Desa. Nilza Maria Pôssas de Carvalho

Corregedora Regional Eleitoral
TRE-MT

Dr. Antônio Veloso Peleja Júnior
Juiz Auxiliar da Corregedoria Regional
Eleitoral

Ainore ere Equipe Técnica keje

Benilton Pereira Kogebou (**bapera epa**)

Carlos Luanga Ribeiro Lima Daniele

Cavalcante Dias

Gustavo Leandro Martins dos Santos

Karina Dziedzic

Kelsen de França Magalhães

Nara Assis

Patrícia de Castro Sousa Simionato

Sueli Sanae Shimada Ueda

Tiago Lima Magalhães da Cunha

Viviane Zaitum

Projeto gráfico

Daniel Dino de Sousa Cardoso

Vinnícius Araújo Fixina

Imagens

Acervo Funai

Governo de Mato Grosso

Apoio:

Sicoob União MT/MS

Agência Tribunal de Justiça de Mato Grosso





Tribunal
Regional
Eleitoral
de Mato Grosso

